

BON DIA Aruba
www.bondia.com

• Deporte • Social • Suceso • Cultural



Cu presentacion di vários banda local y show cultural

Prinses Margriet ta haci apertura oficial di Museo Arqueologico Nacional Aruba

Riba diadomingo 26 di Juli riba e plein dilanti Museo



ORANJESTAD - Museo Arqueologico Nacional Aruba ta habri su portanan oficial riba dia 26 di Juli 2009 durante un evento gratis cu ta cuminsa for di 6:00PM pa 10:00PM riba e plein dilanti e museo mes. Esaki a keda anuncia ayera durante un conferencia di prensa teni dilanti e museo situa den Schelpstraat. E apertura di Museo ta un evento nacional. Un evento sumante importante den historia di Aruba y nos ta spera cu bo tambe lo forma parti di dje.

E programa oficial ta cuminsa cu musica di Le Groove, sigui pa un pre-show bou direccion di Takhai Mohamed. Despues ta sigui e acto oficial di apertura di museo y cu manera indica anteriormente, lo ser efectua pa Su Altesa Real Prinses Margriet y Professor mr. Pieter van Vollenhoven.

Despues di e acto di apertura oficial lo sigui un show spectacular den aire liber. E show aki ta un 'regalo' di Hulanda en coneccion cu Weganan di Reino Cultural e asina jama Cultura di Reino. Meta di Weganan di Reino Cultural ta pa fortifica lasonan den Reino por medio di cultura. E tremendo show aki ta conta cu participacion di diferente artista for di henter reino. Entre otro por menciona Roland Colastica di Corsou, Yourmay Dormoy di St. Maarten, Jacky Bernabella for di Bonaire. For di Aruba nos tin Alydia Wever, Rufo Odor y hopi mas. Mas di 100 hende lo participa den e show aki. E ta un show pa famia. Ta bai tin baile, musica y hopi sorpresa. E show lo ta over di piscadornan di reino y alaves di hobenan di Reino. E

show ta bou direccion di Aike Dirkzwager di Hulanda y Takhai Mohamed. Musica y special effect lo ta den man di Datapanik. Y pa sera e anochi lo tin musica di Youth Extreme y sonido intifada.

Tur hende ta bon bini pa bin wak y gosa. Entrada pa e evento ta completamente gratis. Lo bai tin tribuna pa hende por sinta y alaves lo tin bus disponibel, cu lo pasa den tur distrito.

Specialmente pa e ocasiona ki a laga traha un logo y nomber nobo pa e museo. Cu e apertura oficial di Museo Arqueologico Nacional Aruba ta introduce e edificio

nobo, como tambe e exposicion permanente nobo como tambe e prome exposicion temporario. Museo tin un imagen nobo cu ta encera un "house style" nobo cu a ser desaroya pa e mesun compania cu a traha e diseño di e exposicion permanente nobo cu ta Lord, Cultural Resources y a ser financia pa UNOCA. E housestyle nobo aki ta encera e logo nobo di Museo cu ta tanto tradicional como moderno y cu ta inspira riba un artefacto di ceramica den nos coleccion. Ceramica ta e parti mas grandi den e coleccion di Museo. E logo ta un "top view" di e potchi cu ta mira aki riba e banner, cu ta un potchi cu a ser restaura y por mira e patronchinan bek den e logo. Cu apertura di e Museo nobo e nomber ta cambia y ta haya e palabra Nacional aserca dor cu su coleccion ta di pais Aruba of ta den bruikleen di pais Aruba, kieren e ta di pueblo di Aruba. Den e exposicion nobo lo bin tambe artefactonan cu Museo ta haya den bruikleen di Rijksmuseum Volkenkunde Leiden

como tambe un pieza di arte contemporaneo cual lo ser traha pa e artista local sr. Ciro Abath y pa cual a haya sosten financiero di Banco Central.

Mester menciona cu e tema di e exposicion special aki ta "RANCHO". E idea tras di e proyecto aki ta cu a muda den un barrio nobo y ta desea di duna un homenaje na e historia di e barrio aki como tambe su arkitektura y personahenan den e barrio. Alavez Museo ta desea di contribui na un desaroyo fructifero den e barrio aki.

Den e proyecto aki tin como curator Yolanda Richardson, un docente na EPI sector Salubridad y servicio y tambe ta bin di e barrio aki. Roland Hart, kende ta un hoben dinamico cu un experiencia interesante den exterior y actualmente ta docente na



EPB Hato. Kees de Jong encarga cu e parti educativo den e exposicion, Kees ta un docente na IPA y un fiel colaborador di museo pa hopi aña caba y entre otro tabata miembro di e designcomity di e exposicion permanente. Floor Huygen, encarga cu e parti di scirbimento di e tekstonan pa e exposicion. Floor ta un reportero hopi conoci aki na Aruba specialmente den e parti di Cultura. Y e seccion audio visual ta den encargo di e hoben artista Ryan Oduber.

Pa logra tur esaki, mester yama danki na financiadornan di European Development Fund, Gobierno di Aruba, Ministerio di Labor, Deporte y Cultura, Ministerio di Financia, UNOCA, Cede Aruba, Prins Bernard Cultuurfonds, como tambe na tur otro departamento di Gobierno, instancianan y personanan cu na un of otro manera a yuda na e proyecto di Museo Arqueologico Nacional Aruba.